

Na osnovu člana IV.4.a) Ustava Bosne i Hercegovine, Parlamentarna skupština Bosne i Hercegovine na 49. sjednici Predstavničkog doma, održanoj 6. juna i 8. jula 2013. godine, i na 33. sjednici Doma naroda, održanoj 5. novembra 2013. godine, usvojila je

ZAKON
O IZMJENAMA I DOPUNAMA ZAKONA O JAVNIM NABAVKAMA
BOSNE I HERCEGOVINE

Član 1.

U Zakonu o javnim nabavkama Bosne i Hercegovine ("Službeni glasnik BiH", br. 49/04, 19/05, 52/05, 94/05, 8/06, 24/06, 70/06, 12/09 i 60/10), u članu 49. u stavu (7) na kraju teksta briše se interpunkcijski znak tačka i dodaju riječi: "na mandat od pet godina."

Član 2.

Iza člana 49. dodaju se novi čl. 49a. i 49b. koji glase:

"Član 49a.

- (1) URŽ će imati dvije ispostave sa sjedištem u Banjoj Luci i Mostaru. Ispostave neće imati status pravnih lica. Ispostave će imati pečate identične pečatu URŽ-a, koji će kao jedinu dozvoljenu razliku sadržavati naziv i lokaciju ispostave.
- (2) Ispostave u Banjoj Luci i Mostaru imaju po pet članova, od kojih su tri člana priznati stručnjaci upravnog prava i/ili upravnog postupka nespojiv sa obavljanjem bilo koje druge posredno ili neposredno izabrane ili imenovane dužnosti sa izuzetkom akademske aktivnosti, a dva člana su stručnjaci u oblasti izvođenja radova, javnih nabavki, transporta i strateškog poslovnog upravljanja, a biraju se javnim konkursom na način predviđen podzakonskim aktima.
- (3) Članovi URŽ-a u ispostavama u Banjoj Luci i Mostaru imenuju se na isti način kao i članovi URŽ-a u sjedištu.
- (4) URŽ sa sjedištem u Sarajevu nadležan je za donošenje odluka po žalbama za nabavke u vrijednosti većoj od 800.000,00 KM kao i za sve nabavke institucija Bosne i Hercegovine i institucija Brčko Distrikta BiH.

(5) Ispostave URŽ-a u Banjoj Luci i Mostaru nadležne su za donošenje odluka po žalbama za nabavke u vrijednosti do 800.000,00 KM. Odluke po žalbama koje donose ispostave URŽ-a u Banjoj Luci i Mostaru su konačne.

(6) Nadležnost ispostava iz stava (5) ovog člana određuje se prema sjedištu ugovornog organa.

Član 49b.

(Uslovi za prijevremeno razrješenje članova URŽ-a)

Parlamentarna skupština Bosne i Hercegovine može prije vremena razriješiti članove URŽ-a u sjedištu ili ispostavama samo u slučajevima ako član URŽ-a:

- a) podnese ostavku PSBiH;
- b) je pravosnažno osuđen za krivično djelo na kaznu zatvora u trajanju dužem od šest mjeseci;
- c) trajno izgubi radnu sposobnost za obavljanje svoje dužnosti."

Član 3.

Iza člana 50. dodaju se novi čl. 50a. i 50b. koji glase:

"Član 50a.

(Sadržaj žalbe)

Žalba iz člana 51. stav (5) obavezno sadrži:

- a) Ime ili naziv žalioca, prebivalište ili sjedište žalioca, ime opunomoćenika žalioca ako ga ima;
- b) Naziv ugovornog organa protiv kojeg se podnosi žalba;
- c) Dokaze koji potvrđuju blagovremenost podnošenja žalbe, u skladu s rokovima propisanim ovim zakonom;
- d) Broj i datum postupka javne nabavke i podatke o objavi obavještenja o javnoj nabavci, ako je obavještenje objavljeno;
- e) Broj i datum odluke o izboru ponude, poništenju postupka ili druge odluke ugovornog organa;
- f) Druge podatke o radnji, propuštanju radnje ili postupcima ugovornog organa koji su predmet postupka ili o predmetu nabavke;
- g) Opis činjeničnog stanja;
- h) Opis povreda ovog zakona i podzakonskih akata i obrazloženje;
- i) Prijedlog dokaza;
- j) Dokaz o plaćenju naknade za pokretanje žalbenog postupka, u iznosima propisanim članom 50b. ovog zakona.
- k) Potpis žalioca ili potpis ovlaštenog lica odnosno opunomoćenika (ako ga žalilac ima) i pečat (ako ga žalilac ima).

Član 50b.

(Naknada za pokretanje žalbenog postupka)

- (1) Žalilac je obavezan da plati naknadu za pokretanje žalbenog postupka u iznosu od:
 - a) 500,00 KM za procijenjenu vrijednost nabavke do 50.000,00 KM;
 - b) 800,00 KM za procijenjenu vrijednost nabavke od 50.000,00 KM do 80.000,00 KM;
 - c) 2.000,00 KM za procijenjenu vrijednost nabavke od 80.000,00 KM do 250.000,00 KM;
 - d) 5.000,00 KM za procijenjenu vrijednost nabavke od 250.000,00 KM do 400.000,00 KM;
 - e) 8.000,00 KM za procijenjenu vrijednost nabavke od 400.000,00 KM do 800.000,00 KM;
 - f) 12.000,00 KM za procijenjenu vrijednost nabavke od 800.000,00 KM do 9.000.000,00 KM;
 - g) 25.000,00 KM kada je vrijednost nabavke jednaka ili veća od 9.000.000,00 KM.
- (2) Žalilac uplaćuje odgovarajući iznos naknade iz stava (1) ovog člana na osnovu podataka o procijenjenoj vrijednosti nabavke iz tenderske dokumentacije.
- (3) Prije razmatranja žalbi, URŽ je dužan utvrditi da li je žalilac uplatio naknadu u skladu sa st. (1) i (2) ovog člana.
- (4) Ako procijenjena vrijednost nabavke nije poznata u trenutku izjavljivanja žalbe URŽ-u ili nije objavljena, naknada za pokretanje žalbenog postupka plaća se u iznosu od 2.000,00 KM. URŽ će pozvati žalioca na plaćanje razlike naknade u određenom roku ako se tokom žalbenog postupka utvrdi da je naknada plaćena u nedovoljnom iznosu.
- (5) Kada se žalba izjavljuje na odluku o odabiru ili poništenju, a ne odnosi se na nabavku u cjelini, nego za jedan ili više lotova nabavke, naknada iznosi trećinu iznosa iz stava (1) ovog člana.
- (6) Naknada se uplaćuje u korist budžeta institucija Bosne i Hercegovine i međunarodnih obaveza Bosne i Hercegovine i ona je nepovratna u slučaju neosnovane žalbe.
- (7) Ministarstvo finansija i trezora BiH donijet će instrukciju o načinu uplate i kontrole naknada propisanih ovim članom."

Član 4.

(Prijelazne i završne odredbe)

Predsjedavajući URŽ-a dužan je u roku od 30 dana od dana donošenja ovog zakona izmijeniti Pravilnik o unutrašnjoj organizaciji u skladu s odredbama ovog zakona.

Član 5.

Ovaj zakon stupa na snagu osmog dana od dana objavljivanja u "Službenom glasniku BiH".

Broj: 01,02-02-1-25/13
5. novembra 2013. godine
Sarajevo

Predsjedavajući
Predstavničkog doma
Parlamentarne skupštine BiH

dr. Denis Bećirović

Prvi zamjenik
predsjedavajućeg Doma naroda
Parlamentarne skupštine BiH

dr. Dragan Čović